

## **ՀՀ ԿԱ պետական եկամուտների կոմիտե**

### **Հարկային և մաքսային մարմինների գանգատարկման հանձնաժողով**

**Ո Ր Ո Շ ՈՒ Մ 37/9**

**29 նոյեմբերի 2016թ.**

Քննարկվեց «Վանաձորի Գլորիա կարի ֆաբրիկա» ՍՊԸ գանգատը ՀՀ ԿԱ ՊԵԿ Գուգարքի տարածաշրջանային մաքսատան պետի 19.10.2016թ. թիվ 84/16 որոշման դեմ:

**«Վանաձորի Գլորիա կարի ֆաբրիկա» ՍՊԸ գանգատում բերված փաստարկները.**

ՀՀ ԿԱ ՊԵԿ Գուգարքի տարածաշրջանային մաքսատան պետի կողմից 19.10.2016թ. կայացվել է «Վարչական տուգանք նշանակելու մասին» թիվ 84/16 որոշումը (այսուհետ նաև՝ Որոշում), որով Վարչական իրավախախտումների վերաբերյալ ՀՀ օրենսգրքի 169.2-րդ հոդվածի հատկանիշներով նշանակվել է տուգանք նվազագույն աշխատավարձի հիսնապատիկի չափով: Որոշման մեջ նշվում է, որ «Վանաձորի Գլորիա կարի ֆաբրիկա» ՍՊԸ-ի կողմից 09.09.2016թ. ներկայացված թիվ 05100030/090916/0000982 գրանցման համարով մաքսային վիճակագրական ձևի մեջ կա սխալ՝ «քանակ» դաշտում նշվել է բրուտո քաշը: Սակայն որևէ հղում չկա, թե ինչու է «քանակ» դաշտում բրուտո քաշը նշելը համարվում սխալ կամ արդյոք որ իրավական ակտի, որ պահանջն է խախտվել:

Հարկ է նշել, որ Որոշման մեջ հիշատակված ՀՀ կառավարության 23.04.2014թ. թիվ 447-Ն որոշմամբ սահմանվել է խնդրո առարկա հանդիսացող «ապրանքների փոխադրման հաշվառման վիճակագրական ձևը», սակայն դրանում որևէ ցուցում չի պարունակվում այդ ձևի լրացման վերաբերյալ: Ավելին, նշված վիճակագրական ձևում «քանակ» դաշտ պարզապես առկա չէ:

Մյուս կողմից անհրաժեշտ է ուշադրություն դարձնել այն հանգամանքին, որ տուգանք նշանակելու համար որպես իրավական հիմք հանդիսացած Վարչական իրավախախտումների վերաբերյալ ՀՀ օրենսգրքի 169.2-րդ հոդվածի դիսպոզիցիան պարունակում է երկու ոչ իրավաչափ արարք՝

1. վիճակագրական դիտարկումներին վերաբերող փաստաթղթեր չներկայացնելը կամ

2. սահմանված կարգի խախտումով ներկայացնելը:

Ակնհայտորեն իմ կողմից թույլ չի տրված 1-ին արարքը, քանի որ Որոշման մեջ հստակ նշված է, որ հաշվետվությունները հանձնվել են սահմանված ժամկետում:

Գանգատաբերը գտնում է, որ 2-րդ արարքը նույնպես թույլ տրված չէ, քանի որ համապատասխան վիճակագրական ձևը լրացնելիս չի խախտվել որևէ սահմանված կարգ: Հետևաբար կիրառելի չէ Վարչական իրավախախտումների վերաբերյալ ՀՀ օրենսգրքի 169.2-րդ հոդվածը:

Ելնելով վերոշարադրյալից՝ գանգատաբերը խնդրում է բեկանել ՀՀ ԿԱ ՊԵԿ Գուգարքի տարածաշրջանային մաքսատան պետի 19.10.2016թ. թիվ 84/16 որոշումը և կարճել վարչական վարույթի գործը:

**ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովի եզրակացությունը.**

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության.

Քննարկման ընթացքում նշվեց, որ ՀՀ ԿԱ ՊԵԿ ԳՏՄ պետը, ուսումնասիրելով «Վանաձորի Գլորիա կարի ֆաբրիկա» ՍՊԸ տնօրեն Գագիկ Դարբինյանի կողմից վարչական իրավախախտում կատարելու վերաբերյալ նյութերը պարզել է, որ 20.09.2016թ. թիվ 02/7-1/1204487-16 գրությամբ ՀՀ ԿԱ ՊԵԿ ԳՏ մաքսատուն է ուղարկվել ԵՏՄ անդամ երկրների հետ փոխադարձ առևտուր իրականացրած և հաշվետվություններ չներկայացրած (կամ սխալ ներկայացրած) կազմակերպությունների և անհատ ձեռնարկատերերի ցանկը: Ըստ այդ ցանկի, «Վանաձորի Գլորիա կարի ֆաբրիկա» ՍՊԸ-ի անվամբ օգոստոս ամսում լրացվել է 5 տարանցիկ հայտարարագրեր, որոնցից մեկի վերաբերյալ վիճակագրական հաշվետվությունը ներկայացվել է սխալ: Մասնավորապես, գործի նյութերի ուսումնասիրությունից պարզվել է, որ ընկերությունը օգոստոս ամսում կատարել է 5 գործարք: Վիճակագրական հաշվետվությունները օգոստոս ամսվա համար ներկայացվել է սահմանված ժամկետում, սակայն հաշվետվություններից մեկը ներկայացվել է սխալ, այն է՝ ներկայացված հաշվետվության մեջ «քանակ» դաշտում նշվել է բրուտո քաշը, որը սահմանված կարգով անվավեր է ճանաչվել:

Ելնելով վերոգրյալից և ղեկավարվելով Վարչական իրավախախտումների վերաբերյալ ՀՀ օրենսգրքի 169.2 հոդվածի դրույթներով ՀՀ ԿԱ ՊԵԿ Գուգարքի տարածաշրջանային մաքսատան պետի կողմից 19.10.2016թ. կայացվել է թիվ 84/16 որոշումը, որի համաձայն ընկերության տնօրեն Գագիկ Դարբինյանի նկատմամբ կիրառվել է վարչական տույժ՝ գումարով 50.000 դրամ:

Քննարկվող դեպքում ընկերության կողմից օգոստոս ամսվա վիճակագրական հաշվետվությունը ներկայացվել է սահմանված ժամկետում, սակայն դրանում «քանակ» դաշտում նետո քաշի փոխարեն նշվել է բրուտո քաշը, ինչը և հիմք է հանդիսացել Վարչական իրավախախտումների վերաբերյալ ՀՀ օրենսգրքի 169.2 հոդվածով նախատեսված պատասխանատվության միջոցը կիրառելու համար:

Վարչական իրավախախտումների վերաբերյալ ՀՀ օրենսգրքի 169.2 հոդվածի համաձայն՝ Իրավաբանական անձանց, օտարերկրյա իրավաբանական անձանց՝ ՀՀ տարածքում գործող առանձնացված ստորաբաժանումների, պետական և տեղական ինքնակառավարման մարմինների, հիմնարկների պաշտոնատար անձանց, անհատ ձեռնարկատերերի կողմից պետական վիճակագրական հաշվետվությունները և պետական վիճակագրական դիտարկումներին վերաբերող այլ փաստաթղթերը չներկայացնելը կամ սահմանված կարգի խախտումով (սահմանված ժամկետների կամ ամբողջ ծավալի խախտումներով կամ աղավաղումներով) ներկայացնելը՝ առաջացնում է նախազգուշացում կամ տուգանքի նշանակում՝ սահմանված նվազագույն աշխատավարձի քսանապատիկի չափով:

Հարկ է նշել, որ «Ապրանքների փոխադրման հաշվառման վիճակագրական ձևը» սահմանված է ՀՀ կառավարության 23.04.2014թ. թիվ 447-Ն որոշման հավելված թիվ 2-ով:

Ապրանքների փոխադրման հաշվառման վիճակագրական ձևի «16. Նետո քաշ (կգ)» դաշտում լրացվում են ապրանքի նետո քաշի վերաբերյալ տվյալները:

Տվյալ դեպքում ընկերության կողմից ներկայացված Ապրանքների փոխադրման հաշվառման վիճակագրական ձևի «16. Նետո քաշ (կգ)» դաշտում նշվել է ապրանքի նետո քաշը, այսինքն՝ 16-րդ դաշտում ապրանքի վերաբերյալ տվյալները նշվել են ճիշտ՝ նետո քաշով: Ապրանքի բրուտո քաշն ընկերության կողմից նշվել է հաշվետվության «18. Լրացուցիչ միավոր» դաշտում, ինչը վարչական պատասխանատվություն կիրառող դիտել է որպես հաշվետվությունը սխալ ներկայացվելու դեպք: Այսինքն, «18. Լրացուցիչ միավոր» դաշտում ապրանքի բրուտո քաշի նշվելու հանգամանքը դիտվել է որպես վիճակագրական հաշվետվությունը սահմանված կարգի խախտումով (սահմանված



ժամկետների կամ ամբողջ ծավալի խախտումներով կամ աղավաղումներով) ներկայացված լինելու դեպք:

Հանձնաժողովը գտնում է, որ քննարկվող դեպքում «Ապրանքների փոխադրման հաշվառման վիճակագրական ձևի» լրացման կարգի բացակայության պայմաններում ընկերության կողմից օգոստոս ամսվա համար ներկայացված վիճակագրական հաշվետվությունը չի կարող դիտվել որպես սահմանված կարգի խախտումով ներկայացված, հետևապես նաև Վարչական իրավախախտումների վերաբերյալ ՀՀ օրենսգրքի 169.2 հոդվածով նախատեսված պատասխանատվության միջոցը տվյալ դեպքում կիրառելի չէ:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի, «Մաքսային ծառայության մասին» ՀՀ օրենքի 37-րդ հոդվածի պահանջներով Հանձնաժողովը

### ո Ր Ո Շ Ո Ւ Մ Է՝

Բեկանել ՀՀ ԿԱ ՊԵԿ Գուգարքի տարածաշրջանային մաքսատան պետի 19.10.2016թ. թիվ 84/16 որոշումը, իսկ գործը՝ կարճել:

Հանձնաժողովի նախագահ՝



Վ.ՄԻՐՈՒՄՅԱՆ